



Broj/Број: 01/5-50-1-12-29/05  
Sarajevo/Сарајево: 29.8.2005.godine.

## Z A P I S N I K

30. sjednice Komisije za ljudska prava, imigraciju, izbjeglice i azil, održane 29.8.2005. godine, s početkom u 11,00 sati.

Sjednici Komisije prisustvovali su:

- Martin Raguž, prvi zamjenik predsjedatelja Komisije (prisutan od 11,20 sati),
- Senija Kapetanović, član Komisije,
- Marija Perkanović, član Komisije,
- Muhamed Altić, član Komisije,
- Vlatka Komšić, član Komisije,
- Nadžida Mlačo, član Komisije.

Odsustvovali su: Elmir Jahić, predsjedatelj Komisije; dr. Tihomir Gligorić, drugi zamjenik predsjedatelja Komisije, te Selim Bešliagić, član Komisije.

Od gostiju, sjednici su prisustvovali: Slobodan Nagradić, pomoćnik ministra za ljudska prava i izbjeglice BiH; Agović Amra, predstavnik Misije OSCE u BiH; Anđelka Dobrilović iz Istraživačkog centra PSBiH, te predstavnici sredstava informiranja (tiska i televizije).

Za sjednicu je usvojen slijedeći:

### Dnevni red:

1. Usvajanje zapisnika 29. sjednice Komisije,
2. Rasprava o Prijedlogu zakona o izmjenama i dopunama Zakona o ombudsmanu za ljudska prava BiH,
3. Dogovor o aktivnosti Komisije u rujnu 2005. godine,
4. Tekuća pitanja

Prije zvaničnog otvaranja sjednice, tajnik Komisije je predložio da prisutni članovi Komisije između sebe izaberu predsjedatelja Komisije, jer sjednici Komisije nisu pristvovali predsjedatelj niti njegovi zamjenici. Članovi Komisije su za predsjedatelja na 30. sjednici Komisije izabrali Muhameda Altića, koji je počeo voditi sjednicu Komisije.

**Muhamed Altić**, nakon izbora zvanično je otvorio 30. sjednicu Komisije, pozdravio prisutne, te stavio na usvajanje dnevni red sjednice, koji je jednoglasno usvojen. Takođe je iznio primjedbu da su rukovodeći članovi Komisije trebali biti prisutni na ovoj sjednici Komisije.

Prije rasprave o svakoj točki dnevnog reda, na pitanje tajnika da li je ova sjednica zatvorena za sredstva informiranja, Muhamed Altić, član Komisije je pokrenuo raspravu među članovima po tom pitanju.

**Senija Kapetanović**, iznijela je svoje mišljenje o prisustvu medija, ističući da je prisustvo predstavnika medija delikatno zbog važne materije koja je na dnevnom redu.

**Muhamed Altić**, na iznešenu primjedbu je odgovorio da dnevni red 30. sjednice Komisije ne sadrži osjetljivu materiju i da po njegovom mišljenju predstavnici medija mogu biti prisutni zasjedanju Komisije, nakon čega je svoj prijedlog stavio na glasanje. Prijedlog o prisustvu predstavnika medija na sjednici Komisije je jednoglasno usvojen.

Nakon usvajanja dnevnog reda i odluke o prisustvu sredstava informisanja, ulogu predsjedatelja Komisije je preuzeo Martin Raguž, prvi zamjenik predsjedatelja Komisije, koji je u međuvremenu stigao na sjednicu

#### **Ad. – 1. Usvajanje zapisnika 29. sjednice Komisije**

Otvarajući prvu točku dnevnog reda, **Martin Raguž**, otvorio je raspravu na zapisnik 29. sjednice Komisije. Nijedan od prisutnih članova nije uzeo riječ o ovoj točki dnevnog reda.

**Kako nije bilo diskusije o ovoj točki dnevnog reda, prvi zamjenik predsjedatelja dao je na glasanje zapisnik, te nakon glasanja konstatirao da je zapisnik 29. sjednice Komisije jednoglasno usvojen.**

#### **Ad. - 2. Rasprava o Prijedlogu zakona o izmjenama i dopunama Zakona o ombudsmanu za ljudska prava BiH**

U uvodu za ovu točku dnevnog reda **prvi zamjenik predsjedatelja Komisije** je istakao važnost donošenja ovog zakona, te napomenuo da je on iz paketa od 44 zakona koje Parlamentarna skupština treba usvojiti i koji su neophodni za ulazak Bosne i Hercegovine u procese koji vode europskoj integraciji. On je podsjetio članove Komisije na činjenicu da je Prijedlog ovog zakona ranije prošao komisijsku fazu, ali nije usvojen na sjednici Zastupničkog doma PSBiH, te zatražio od tajnika Komisije da predoči dosadašnje stanje po ovom Prijedlogu zakona koji po drugi put prolazi komisijsku proceduru.

**Tajnik Komisije** je iznio podatak da je Prijedlog zakona o izmjenama i dopunama Zakona o ombudsmanu za ljudska prava BiH dana 30. 3. 2005. godine došao u parlamentarnu proceduru i da je i danas u komisijskoj fazi. Na posljednoj sjednici Komisije o ovoj točki dnevnog rada usvojen je zaključak da se odgodi za 30 dana izjašnjavanje o ovom prijedlogu zakona, jer je to vrijeme bilo potrebno da predsjedatelj Komisije Elmir Jahić zajedno sa predlagateljima amandmana Martinom Ragužom i Momčilom Novakovićem održi neformalni sastanak radi usaglašavanja amandmana, što nije urađeno. Također, u ovom periodu je Momčilo Novaković trebao pribaviti izjašnjenje Narodne skupštine RS o prijenosu nadležnosti po pitanju ombudsmena, o čemu tajnik nema nikakvih informacija, šta je urađeno i da li je kakav pomak napravljen.

Tajnik je skrenuo pažnju i na to da je Zastupnički dom PSBiH usvojio novi Poslovnik, po kojem će ova Komisija doživjeti transformaciju, kada i Dom naroda Parlamentarne skupštine donese svoj Poslovnik, te kad se oni objave u «Službenom glasniku BiH».

**Martin Raguž** je istakao da je najveći broj njegovih amandmana prihvaćen od strane Vijeća ministara BiH, a da od onih preostalih bi mogao odustati, kako bi se ovaj Prijedlog zakona mogao što prije uputiti Zastupničkom domu. Uzimajući u obzir sve ono što je sekretar Komisije naveo, on smatra da bi narednu sjednicu Komisije trebalo zakazati za deset dana.

**Slobodan Nagradić, pomoćnik ministra za ljudska prava i izbjeglice u BiH** kazao je da tranzicioni period po Prijedlogu zakona fiksno određen, što znači da iz razloga prolongiranja ovog Prijedloga zakona, entitetske institucije će biti stiješnjene, imat će puno obaveza i on ne zna kako će to riješiti za tako mali vremenski period.

**Marija Perkanović**, predložila je da se ovo pitanje još jednom odloži radi postizanja što kvalitetnijeg rješenja. Takođe je skrenula pažnju da Vijeće ministara BiH nije uvažilo jedan velik broj principa kad je u pitanju prenos ovlaštenja i apeluje da svi činioци koji učestvuju u dogovoru trebaju da se trude da rješenja koja se iznalaze budu pozitivna za sve.

**Senija Kapetanović**, ističe da je kod ovog Prijedloga zakona uloženo već dovoljno strpljenja i vremena kako bi se postigao uspjeh, a ne doživio krah, da stalna odgađanja izjašnjavanja o ovom Prijedlogu zakona prelazi sve mjere, te upozorila da se ovakva situacija za narednu sjednicu ne smije ponoviti i da se ovo pitanje treba konačno riješiti.

**Martin Raguž**, još jednom je podsjetio da se o ovom Prijedlogu zakona nastoji da postigne saglasnost od strane svih relevantnih institucija, kako bi ovim zakonom svi bili zadovoljni i napominje da bi se on o svojim amandmanima mogao na sjednici izjasniti, ali o amandmanima Momčila Novakovića ne može se zauzeti nikakav stav, jer on nije prisutan na sjednici Komisije. Zatim je predložio da se naredna sjednica Komisije održi u predstojećih 15 dana i da se tada Komisija izjasni o podnesenim amandmanima i sačini izvješće.

**Na kraju, Martin Raguž, predložio je zaključak, kojeg su članovi Komisije i prihvatili jednoglasno, da se naredna sjednica Komisije održi u predstojećih 15 dana, a u njenom mandatu da se razmotri Prijedlog zakona, ponudeni amandmani te sačini izvješće koji će se uputiti Zastupničkom domu na razmatranje.**

### **Ad. – 3. Dogovor o aktivnosti Komisije u rujnu 2005. godine**

Otvarajući ovu točku dnevnog reda, **Martin Raguž** riječ je dao tajniku Komisije, predlažući da tajnik informira prisutne o zadacima Komisije u narednom mjesecu.

Tajnik Komisije dr Zijad Hasić podsjetio je prisutne članove Komisije na novi Poslovnik Zastupničkog doma, kojeg je Dom usvojio, kao i na transformaciju ove Komisije koja slijedi prema odredbama novog Poslovnika. On je naveo da u toku rada ove Komisije ima dosta započetih, a nedovršenih poslova koji bi se trebali privesti kraju u mandatu Komisije. Između ostalog naveo je slijedeće poslove:

- pitanje općina i njihovih prihvatnih centara,
- obilasci sveučilišta u BiH,
- rad pojedinih podkomisija za predstavke građana,
- posjete Kazneno-popravnim zavodima u BiH.

Također, podsjetio je da je na prošloj sjednici svakom članu Komisije dostavljen Prijedlog obilazaka KPZ u BiH s rasporedom članova za pojedine posjete i da su taj Prijedlog dobili svi članovi Komisije.

**Martin Raguž**, predložio je da se do isteka mandata Komisije pokušaju završiti obilasci Kazneno-popravnih zavoda u Bosni i Hercegovini i već započeti obilasci sveučilišta u BiH. Također, zatražio je da tajnik Komisije iskoordinira posjete sveučilištima u BiH, koji su ostali neposjećeni, te zatražio da on bude predviđen u grupi za posjetu Kazneno-popravnim zavodu u Zenici.

**Muhamed Altić**, predložio je da nosioci grupa za posjete KPZ u BiH dogovore datum i vrijeme posjete s ostalim članovima grupe kako bi se ta posjeta mogla realizirati.

**Ipak na kraju je zatraženo od tajnika Komisije da u prvoj polovini mjeseca rujna iskoordinira datume za posjete KPZ u BiH.**

Zatim se raspravljalo o predstavi Momčila Krajišnika gdje je **Marija Perkanović**, predložila da se ova predstavka okonča na ovoj sjednici Komisije. Martin Raguž je predložio da se predstavka Momčila Krajišnika uvrsti kao posebna točka dnevnog reda za iduću sjednicu Komisije s čim je i Marija Perkanović bila zadovoljna.

Dalje se raspravljalo o posjeti Kazneno-popravnom zavodu u Zenici, gdje je **Marija Perkanović** za ovu posjetu predložila da članovi potkomisije koji su posjetili ovaj Kazneni zavod ponovo razmotre predmet posjete, da se o tom sastavi izvješće i da se onda pripremi odgovor na zastupničko pitanje Filipa Andrića.

**Senija Kapetanović i tajnik dr Zijad Hasić** podsjetili su da je na prošloj sjednici Komisije o obavljenoj posjeti utvrđeno Izvješće i da je to poslano Filipu Andriću kao odgovor na zastupničko pitanje, kao i odgovor za stranku koja se obratila Komisiji.

**Marija Perkanović** istakla je da Potkomisija nije usvojila Izvješće o ovom pitanju iako je zbog toga i formirana, već je Izvješće utvrđeno na sjednici Komisije. Zato predlaže da Potkomisija sačini svoje izvješće i prezentira ga Komisiji, koja će tada to izvješće proslijediti kao odgovor na zastupničko pitanje i odgovor podnosiocu predstavke.

**Nakon toga donesen je zaključak da se članovi Potkomisije koji su posjetili KPZ Zenica sastanu i sastave Izvješće o posjeti KPZ u Zenici, kojeg će nakon toga dostaviti Komisiji, a Komisija će na sjednici da otvori raspravu o tom Izvješću.**

#### **Ad. – 4. Tekuća pitanja**

Prvi zamjenik predsjedavajućeg Komisije je nakon otvaranja ove točke dnevnog reda riječ dao **Muhamedu Altiću** koji je apelirao da Komisija na svom sljedećem zasjedanju prije isteka mandata treba da bude u potpunom sastavu, kako bi se predviđeni zadaci mogli realizirati i da se situacija nedolaska članova Komisije ne ponovi.

Završavajući ovu točku dnevnog reda, Komisija je završila svoju 30. sjednicu. Sjednica je završena u 12,15 sati.

TAJNIK KOMISIJE

dr. Zijad Hasić

PRVI ZAMJENIK PREDSJEDATELJA KOMISIJE

Martin Raguž